

四庫全書

子部

欽定四庫全書

子部

證治準繩卷八十一

詳校官太醫院醫士臣舒岱

編修臣倉聖脈覆勘

總校官進士臣朱鈴

校對官助教臣羅萬選

謄錄監生臣姚培雯

欽定四庫全書

證治準繩卷八十一

外科

心臟門

痘瘡源

錢氏曰夫胎在腹中月至六七則已成形食母腹之穢液入兒五臟食至十月即穢液滿胃至生時兒口中猶

明
王肯堂
撰

有不潔產母以手拭淨則無疾病俗以黃連汞粉下其
臍糞之穢此亦母之不潔餘氣入兒臟中本先因微寒
又遇風寒邪氣相搏而成痘疹也未出欲作之時熱動
五臟則五臟之證先見初欲病時先呵欠頓悶驚悸乍
涼乍熱手足冷面腮頰赤燥咳嗽噴嚏此五臟證俱見
也呵欠頓悶者肝也時發驚悸者心也乍涼乍熱手足
冷者脾也面赤腮頰赤咳嗽噴嚏者肺也惟腎無候以
在肺下不能食穢故也凡瘡疹乃五臟毒若出歸一證

肝水疱肺膿疱心為癰脾為疹腎雖無證其候惡者瘡
變倒靨而黑陷則歸腎也此由不慎風冷而不能食內
虛所致也 東垣曰癰疹始出之證必先見面燥顯赤
目胞亦赤呵欠頓悶乍熱乍涼咳嗽噴嚏足稍冷多睡
睡驚竝瘡疹之證或生膿泡大癰或生小紅癰或生瘰
疹此三等不同何故俱顯上證而後乃出蓋已上諸證
太陽寒水起於右腎之下煎熬左腎足太陽膀胱寒水
夾脊逆流上頭下額逆手太陽丙火不得傳道逆於面

上故顯是證蓋壬癸寒水尅丙丁熱火故也諸癰證皆從寒水逆流而出也醫者當知此理乃敢用藥夫胞者一名赤宮一名丹田一名命門男子藏精施化婦人繫胞有孕俱為生化之源非五行也非水亦非火此天地之異名也象坤土之生萬物也夫人之始生也血海始淨一日二日精勝其血則為男子三日四日五日血脈已旺精不勝血則為女子乃二物相搏長育人生之謂也又謂之精其子在母腹十月之間隨母呼吸呼吸者

陽氣也而生動作滋益精氣神饑渴皆隨母血兒隨日
長筋骨皮肉血脈形氣俱足十月降生口中尚有惡血
啼聲一發隨吸而下此惡血復歸命門胞中僻於一隅
隱伏而不發直至兒因內傷乳食濕熱之氣下陷合於
腎中二火交攻榮氣不從逆於肉理惡血乃發諸癍疹
皆出於腎水其瘍後聚肉理歸於陽明故三番癍始顯
之證皆足太陽壬膀胱尅丙小腸其始出皆見於面終
歸於陽明肉理熱化為膿者也二火熾盛反勝寒水遍

身俱出此皆從足太陽傳變中來也 萬氏曰痘疹之原有論穢毒者有論淫火者有論時行正病者靡有定論將謂穢毒淫火耶則一歲之中大而郡縣小而村落病者相似而死相繼未必人人若此之甚也將謂時行正病耶何以自少至老但作一度厥後再無傳染也蓋父母於子一體而分精血之毒已畜於陽施陰化之始固不待誕生之頃嚙其血而後有此證也况男子惜其氣以養其精女子耗其氣以養其血苟失所養即貽他

日之患子之受於父母者雖殊其為毒則一也豈有男
子淫火起於氣為陽毒而易治女子淫火起於血為陰
毒而難治之理邪至於天行正病亦有其時但觀夫年
之所加及有四時不正之氣即知有是正病也然則待
時而發者胎毒也或速而危或徐而持或暴而死者氣
之微甚所使也發則其毒洩矣所以終身但作一度後
有其氣不復傳染焉但痘為胎毒昭昭矣其間或疎而
輕或密而重或重變輕或輕變重變化叵測是又有說

也疎而輕者始終如一密而重者變怪百出或因父母相傳而然或因疫癘相染而然或因鬼疰相著而然杳冥恍惚出於聞見思慮之所不及此與知者道之癡人前不必說夢也何者蓋痘疹之毒父母原自有之雖常作過一番而臟腑經絡皮毛肌肉骨髓之間餘毒猶有存者一但分形化氣注之於子其毒亦隨之洩矣所以子之瘡瘢多肖親也加之調攝失宜放恣無忌其毒益甚瘡痘之候沉困危篤者未必非父母之所致也凡子

之侏儒跛躄必肖於親况痘疹之毒乎且人受天地之氣以生天地之氣變人之氣亦變或遇遷正失守淫勝鬱復之紀德令乖常青苗迭見自然厲氣傳染證候相似所以輕則俱輕重則俱重若有主之者是則疫癘之所為也故人之癘疾而死者精靈不散遊魂往來隨氣而行常以其氣疰於平人而為之疾如癰癩之傳染然形質龐厚福澤悠遠者不能相及苟體虛福薄之人陰陽舛亂之歲則膏肓之豎臺胎之祟互相染著反復變

化術不能禁工不能治也此非鬼疰之害乎夫治此三者當奈何曰必為之豫解其毒平其氣遷其處庶乎可免矣 按痘疹之發顯是天行時氣廛市村落互相傳染輕則俱輕重則俱重雖有異於衆者十之一二而已豈可概謂胎毒哉然疫癘終身不染者比比皆是而痘疹無一人得免疫癘一染之後不能保其不再染而痘瘡一發不再發則胎毒之說又何可盡廢乎至謂淫火穢血古亦有之而何獨無痘疹之患欲以破胎毒之說

則又不然天下之無而忽有者多矣草有名虞美人者
虞美人項王寵姬也為項王死世哀之為之歌對草倚
聲悽慟而草輒搖草無情識也方其未有楚則寵姬亦
無況有草耶一切衆生自妄顛倒而成三界如之又何
疑乎痘疹

預防

萬痘瘡之病皆由父母胎毒畜於命門之中命門者右
腎相火也為人身生化之本故毒藏焉如遇冬令溫和

陽氣暴洩人則感之觸動相火至春夏生長之時其毒
乃發傳染相似是謂天行疫癘也未出痘疹者但覺冬
溫即當預防宜服解毒之藥如辰砂散三豆湯代天宣
化丸皆可用也頻頻與之使瘡疹之毒輕減自然易出
易收無陷伏鬱遏留連之患其辰砂散三豆湯代天宣
化丸以解時行疫癘之毒則可或因父母精血不足者
或其人素有他疾者或發熱之時別藏形證發見者並
宜兼而治之不可徒恃解毒而竟忘其本也如脾胃素

弱者宜以養脾為重解毒次之養脾丸服三之二解毒
三之一如因父母奉養過厚精血畜毒素多胎病者宜
二毒併解以遡源解毒湯代天宣化丸相間服之丹
溪云痘疹初出時或未出時見時人有患者預服此藥
多者令少重者令輕以絲瓜近蒂三寸連皮子燒灰存
性為末沙糖拌勻乾喫入硃砂末更妙

三豆湯

赤小豆

黑大豆

萊豆

各一升生

小甘草

三兩生剉

右以三豆淘淨同甘草用雪水八升

如無用長流水代之煮豆

熟為度去甘草將豆晒乾又入汁再浸再晒汁盡為度逐日取豆水煮任意食之

代天宣化丸

即黃氏五瘟丹加減也

人中黃

屬土甲巳年為君

黃芩

屬金乙庚年為君

黃柏

屬水丙辛年為君

梔子仁

屬木丁壬年為君

黃連

屬火戊癸年為君

苦參

佐

荊芥穗

佐防風去蘆

連翹

酒洗佐

山豆根

佐

牛蒡子

酒淘炒佐

紫蘇葉

佐

右先視其年所屬取其藥以為君其餘主歲者為臣
為君者倍之為臣者半之為佐者如臣四分之三於
冬至日修合為末取雪水煮升麻和竹瀝調神麴為
丸外用辰砂雄黃為衣每服竹葉湯下 製人中黃
法取甘草大者不拘多少用新竹一節納甘草於中
仍緊塞無節空處放屎缸中浸七七日取出晒乾聽
用

溯源解毒湯

當歸身 川芎 生地黃 白芍藥 人參

連翹 黃連 生甘草 陳皮 木通

各等分

右剉細加淡竹葉十片水一盞煎半盞去渣溫服無時

養脾丸

人參 白朮 當歸 川芎

各一錢半

木香 青皮

黃連 陳皮

各一錢

砂仁

山查肉

神麴炒

麥芽

炒各五分

右為末水調神麴糊丸如麻子大每服三五十丸陳
倉米飲下

消瘟丹

未曾出痘及臨出者
宜擇療病日預服

辰砂

研為極細末水飛過週歲以下者五六分一歲以上者服一錢絲瓜近蒂者三寸燒

存性為末
亦如前數

右用密調下或將鴿子及鳩煮熟以辰砂搽上令兒
服之屢試有驗

秘傳保嬰丹

真紫草

去蘆酒洗勿犯鉄器

纒豆藤

燒灰存性各四兩二味為君

川防風

去蘆及人升麻

取新者鹽水炒引下不使侵肺氣

荊芥穗

去梗

牛蒡子

炒各二兩四味為臣

真天竹黃

蟾酥

自取勿用赤眼者

真牛黃

三味各一錢二分

大朱砂

麻黃紫草荔枝殼煮過就將其湯飛研取淨末

三錢味為佐

甘草稍

去皮二兩和

赤小豆

黑小豆

綠豆

各四十九粒炒勿令焦三味為使

右各取細末和勻另用紫草三兩入水三碗煎去渣

熬成膏半碗入生砂糖半碗和劑為丸如芡實大另

用飛過朱砂為衣未出痘之先濃煎甘草湯每服小兒磨一丸大人二丸如已發熱之時生薑湯磨服厚蓋取汗多者可少少者可無大有神効

袁氏痘前治法凡欲治痘須在未發之先預識其證而分別用藥重者可輕輕者可愈但未痘而愈則醫者無功故多不肯盡心及其既發又無及矣仁者須以救生保嬰為心寧我無功不可使嬰兒失命備陳十八證治法於後

孩兒未痘之先感冒風邪身中火烙頭痛自汗咳嗽不
已傷寒未愈而痘隨出焉痘家謂之猿猴跳鎖傷寒之
後元氣窮漓須滋陰補血解熱疎風有滋陰三寶散可
服

滋陰三寶散

當歸 黃芪 生地 白茯苓 芍藥 川芎

橘紅 甘草 防風 玄參 麥門冬

二味
加倍

右剉細薑棗煎

有飲食不能搏節暑濕不能護養肚腹傷壞洩瀉頻仍
飲食懶進肢體羸瘦愈未幾而痘隨出焉痘家謂之觀
音拂座此與先泄而出痘者不同平居無恙忽泄而痘
出此則毒隨泄減其痘反美今久泄初愈而痘出則脾
虛元氣弱如單服補藥恐來虛脹若冷藥則毫釐不可
用者只宜調脾如四製白朮之類可也

四製白朮散

白朮八兩分作四分一分砂仁炒一分糯米炒一分

麩皮炒一分壁土炒揀淨為末量大小乳酒調服

患瘡之後寒熱消燂肌肉漸瘦或乍愈而痘出或帶瘡而患痘名為馬馳劍道多有濕熱釀成此禍草果常山斷不可用即柴胡亦是劫藥須參苓白朮微加消食祛熱之藥如八珍膏衛元湯可用也

八珍膏

人參

一兩密四兩

乳汁

梨汁

同熬

右加製過紫河車酒服兩匙

衛元湯

人參 白朮 金蝎 山查 半夏 當歸

橘紅 枳殼 烏梅

右薑棗煎加乳服

小兒纔五六歲元體薄劣身發火熱乾渴患嗽疹出未
幾而痘隨出焉此太陰脾經症也痘家謂之一葦航海
此與尋常先疹後痘者不同凡先痘後疹者謂之逆先
疹後痘者謂之順此則身弱發熱原患嗽渴又病疹初

愈而痘隨後出其勢頗危須補陰清肺培脾黃芪毫鼈
難犯內托至奇湯可用也

內托至奇湯

天門冬 麥門冬 人參 白朮 當歸

茯苓 薏苡仁 川芎 陳皮 甘草

桔梗 銀杏

去皮

右加糯米煎頻頻服

小兒平時患疳積肚大有青筋四肢羸瘦變為丁奚條

然痘發此謂之三仙八洞治之且莫消疔積厚朴檳榔
柴連冷藥及抱龍丸之類皆不可用宜服蓋黃散滴滴
金可也

滴滴金

蝦蟆肚內有黃金取出金來和酒服

小兒風寒腠理時發火熱自頭連身遍啟丹瘤愈未幾
而痘隨形焉痘家謂之倒挂銀瓶多發肝心二經痘忌
用三黃宜犀角地黃湯紫草散可也

犀角地黄湯

犀角

用乳汁
磨一錢

牡丹皮

芍藥

生地黃

右加燈草水煎服

小兒未痘之前火烙臉赤眼睛直豎手足撒搐口燥識語驚厥屢次不數日而痘隨形焉痘家謂之霜橋印迹此與尋常驚後出痘者不同凡先驚後痘痘出驚止決係心經之痘多是吉徵此則驚甚體虛或見痘而驚不止硃砂金石毫不可用宜茯神湯可也

扶神湯

生地 當歸 甘草 白芍藥 扶神

遠志 桔梗

右加燈草薑煎服

小兒未痘之前身熱自汗口中咯血或鼻衄或溺血不數日而痘隨形焉謂之藕池踏水心官失守致血妄行宜清心按火不可妄用寒涼之劑野仙獨聖散可用也

野仙獨聖散

匾栢 玄參 地榆 血見愁 生地黃

木通 芍藥 當歸身 甘草 乾薑

小兒未痘之先身發火熱飲食懶殮肚腹膨脹眼胞浮腫睡卧不安不數日而痘隨形焉謂之石鼓無鳴宜理脾補氣參苓白朮散加減用之可也

參苓白朮散加減

人參 茯苓 山藥 白扁豆 白朮 陳皮

蓮肉 當歸 薏苡仁 防風 枳實

右劉為散隨宜加減

小兒身發火熱自汗不止眼睛昏花呵欠啼叫未愈而痘隨見焉謂之赤澤裁蓮宜歛汗補肝宜黃芪熬入乳頻頻服之并固真湯可用也

固真湯

綿黃芪

二兩
蜜炒

酸棗仁

四兩

人參

白芍藥

當歸

生地黃 茯苓 甘草 陳皮

右咬咀生薑煎服

小兒平時父母不能護從恣其出入跌蹠傷損頭面肢體未愈而痘隨出焉謂之破甕澄漿宜補血扶脾籠金湯可用也

籠金湯

木香 生地黃 芍藥 紅花 當歸 甘草

白芷 土木鼈 橘紅 木通 桔梗 白朮

右加薑棗煎服

兒輩胸膈飽脹飲食厭惡身發火熱嘔吐頻頻未愈

而痘隨發焉醫家謂之逐鹿亡羊此與尋常先吐後出痘者不同大凡因發痘而吐毒隨吐減出痘必輕今則先因胃氣有傷腹脹惡食吐又頻頻不止則危迫之象矣須要調理脾胃如紫霞黃露飲可用也

紫霞黃露飲

乾薑 半夏 藿香 砂仁 枳殼 陳皮

荳蔻 白木 炒 青皮

右吹咀水煎服

小兒面色萎黃時作潮熱眼胞浮腫肚腹絞痛此為小
瘧木愈而痘隨出焉醫家謂之推車陷雪此因脾胃有
傷漸成疳積祛蟲逐積之藥俱不可用惟調理脾胃為
上策龍旋散最妙

龍旋散

青皮 乾薑 官桂 玄胡索

醋炒

丁香

豈蔻 砂仁 枳殼 檳榔 厚朴 香附

山查 艾葉

右用薑棗煎服

小兒遍身生瘡頭頸膿窠旋繞手足關軸如蛇皮纏裹
寒熱不時噴嚏不止未愈而痘隨出焉醫家謂之霜逐
梧桐法宜涼血衛脾貞元散可用也

貞元散

甘草 桔梗 人參 白芍藥 黃耆 茯苓

木通 紅花 白朮 生地黃 白芷 升麻

陳皮 天花粉

右用燈草煎服

孩兒心中刺痛未愈而痘隨出焉醫家謂之犯奪天梯此非氣逆即為寒積龍蟠飲可用也

龍蟠飲

人參 當歸 枳殼 白芷 羌活 丁香 木香
官桂 青皮 半夏 山查 三稜 二蚕砂
厚朴

右用生薑酒煎服

小兒兩眼風熱紅腫羞明刺痛難忍未愈而痘隨出焉
醫家謂之彈打天烏法宜清肝祛火滋玄窖提陰氣穀
精龍膽散可用也

穀精龍膽散

生地黄 紅花 荆芥 龍膽草 木通 甘草

赤芍藥 穀精草 白茯苓 鼠粘子

右加燈心煎服

小兒飲食過度傷損脾胃或飽悶或吞酸或吐瀉未愈

而痘隨出焉醫家謂之風燕失巢痘全資脾胃急宜消
食理脾消導飲磨積散相兼而用可也

消導飲

厚朴 枳實 砂仁 山查肉 半夏 神麴

檳榔 三稜 蓬朮 丁香

右加乾薑煎服

磨積散

乾蒿 陳皮 麥芽 二蚕砂

右加生薑煎服

兒輩小腹硬脹刺痛小便赤澀難通欲尿則啼不尿則痛未愈而痘隨發焉醫家謂之斷橋失渡此係心經鬱火積於小腸浚牛膏是對證之藥

浚牛膏

大田螺用葱鹽加少麝搗爛為膏熱烘細絹攤貼小腹用手摩之

運氣

袁痘內發於臟腑外應乎運氣天動人隨毫髮不爽是故治痘者以明運氣為急也歷稽往者大率三年一發雖各年零出間一有之而其大發之期則三年為準也所謂三年者多係子午卯酉之年子午少陰君火司天而陽明燥金在泉卯酉陽明燥金司天而少陰君火在泉諸瘡非火不發非金不收痘以少陰陽明二經為正者為是故也然玄化密移主客互用五運有平氣大過不及之殊六氣有常化淫勝反勝相勝之異幾微不同

則全體盡別痘有當盛行而不盛行有不當盛行而傳染周遍者是不可執一論也 萬瘡疹之候或間數年而發或發則連年不已何也經曰不知年之所加氣之盛衰虛實之所起不可以為工矣蓋司天者主行天之令上之位也歲運者主天地之間人物化生之氣中之位也在泉者主地之化行乎地中下之位也一歲之中有此上中下三氣各行化令氣偶符會而同者則通其化其中於人則病矣所以瘡疹必待其年而發也六十

年中天符十二年

戊子戊午己丑己未戊寅戊申
乙卯乙酉丙辰丙戌丁巳丁亥

其中

又四年為太乙天符

戊午己丑
己未乙酉

謂之天符者司天與運

同也太乙天符者司天與運及辰之同也歲會八年

丙子

己丑丁卯甲辰甲戌戊午己未乙酉

謂之歲會者運與支同也同天符六

年

甲辰甲戌庚子
庚午壬寅壬申

同歲會六年

癸卯癸酉癸巳
癸亥辛丑辛未

謂之同

者謂歲運與在泉合其氣化陽年曰同天符陰年曰歲

會也此五者雜而言之共三十六年合而言之止有二

十六年經曰天符為執法歲位為行令太乙天符為貴

人邪之中人則執法者其病速而危行令者其病徐而待貴人者其病暴而死也又子午之歲少陰君火主之寅申之歲少陽相火主之經曰少陰所至為瘍疹少陽所至為嘔嘔瘍瘡惡病暴死凡此數年剛柔失守升降窒抑舊者不退新者不遷則連年發而不已也按運氣之說內經幾居其半而世罕行用蓋泥其常不通其變則以為無驗余友謬仲淳高明善醫至排斥五運六氣之謬不容口余以王炎沈括之說折之亦不服蓋未

嘗虛心而細求之也假令厥陰用事其氣多風民病濕泄豈普天之下皆多風普天之民皆病濕泄耶至於一邑之間而雨暘有不同者此氣運安在欲其無謬不可得也大凡物理有常有變氣運所主者常也異夫所主者變也常則如本氣變則無所不至而各有所占故其候有從逆淫鬱勝復太過不足之變其發皆不同若厥陰用事多風而草木榮茂是之謂從天氣明潔燥而無風此之謂逆太虛埃昏流水不冰此之謂淫大風折木

雲物濁擾此之謂鬱山澤焦枯草木凋落此之謂勝大暑燔燎螟蝗為災此之謂復山崩地震埃昏時作此之謂太過陰森無時重雲晝昏此之謂不足隨其所變疾癘應之皆視當時當處之候雖數里之間但氣候不同而所應全異豈可膠於一定熙寧中京師久旱祈禱備至連日重陰人謂必雨一日驟晴炎日赫然沈時因事入對上問雨期沈對曰雨候已見期在明日衆以謂頻日晦溽尚且不雨如此暘燥豈復有望次日果大雨是

時濕土用事連日陰者從氣已効但為厥陰所勝未能成雨後日驟晴者燥金入候厥陰當折則大陰得伸明日運氣皆順以是知其必雨嗚呼今安得如存中者而與之言運氣哉

疫癘

萬瘡疹雖胎毒必待時令不正之氣相傳染而發蓋春氣溫而夏氣暑熱秋氣清涼冬氣冷冽此四時正氣之序若春應燠而反寒夏應熱而反清秋應涼而反熱冬

應寒而反溫此非其時而有其氣乃不正之令也夫人
感之或為寒熱或為瘧痢或為喉痺或為腫或為斑疹
謂之天行正病又云疫癘是以一歲之中彼此傳染大
小相似又若冬溫陽氣暴泄至於來歲必發瘡疹何也
蓋小雪以後為終之氣太陽寒水主之水德不彰使厥
陰少陰木火之氣反來乘之陽氣早發奉生者少故來
春民多病也况瘡疹之毒藏於至陰之下發於太陽之
經當其時而動其氣毒乃發矣此冬溫之後必發瘡疹

也凡此不正之氣發之泄之解之平之勿犯歲氣是謂良工故治疫癘者以解毒為急

辨疑似

錢傷寒男體重面黃女面赤喘急急各憎寒口中氣熱呵欠頓悶煩急瘡疹則顯赤躁多噴嚏悸動昏倦四肢冷傷寒當發散之瘡疹當溫平之有大熱者宜解毒昏睡喜嚏悸者將發瘡疹

垣辨癰證 呵欠 噴嚏 睡中急驚 耳尖冷 眼

澀 辨傷寒 口熱 口中醋氣 妳辨不消 腹中

疼痛 蔡或傳染或傷風或傷食或痘疹其證不一頭
與肢節疼痛無時者為時疫傳染熱也面赤汗出而鼻
流清涕者為傷風熱也午後發熱頭與肚熱右額有紋
者為傷食熱也乍寒乍熱呵欠頓悶驚悸咳嗽噴嚏兩
頰赤紅飀涼耳涼者為痘疹熱也渾身壯熱妄言鬼神
口鼻衄血驚搐不止幾死而復生為痘疹實熱在內也
錢瘡疹候面燥頰赤目胞亦赤呵欠頓悶乍涼乍熱咳

嗽噴嚏足稍冷夜卧驚悸多睡此瘡痘症天行之病也
瘡疹始出之時五藏證見惟腎無候但見平證爾尻
涼耳涼是也尻耳俱屬於腎其居北方主冷也

張痘之始發有因傷風傷寒而得者有因時氣傳染而
得者有因傷食嘔吐而得者有跌撲驚恐畜血而得者
或為竄眼驚搐如風之證或口舌咽喉腹肚疼痛或煩
躁狂悶昏睡或自汗或下利或發熱或不發熱證候多
端卒未易辨須以耳冷尻冷足冷鼻尖冷驗之竝視其

耳後有紅筋赤縷者為真又脈洪大而弦數診脉之際
身略戰動是其症也歌曰五指稍頭冷驚癇不可安若
還中指熱必定是傷寒中指獨自冷麻痘正相干男左
女右別分明子秘法凡入門看痘未知是否但見心窩
皮膚內有紅色兩耳尖冷耳筋紅見此痘徵也 看耳
筋法未出之先紫筋者不治預以涼血解毒之劑治之
亦有愈者若二便秘結宜先通利大紅者可治而愈水
紅者不藥而愈桃紅者分輕重治之 分男女左右看

驗熱時候錢始發潮熱三日已上熱暈入皮膚即發
瘡癰而不甚多者熱留皮腠之間潮熱隨藏出如早食
潮熱不已為水泡之類也 張痘瘡皆因發熱而出即
其熱之有時可知其自何藏發出寅卯辰時潮熱者屬
肝當出水泡巳午未時潮熱者屬心當出斑瘡申酉戌
時潮熱者屬肺當為膿泡亥子丑時潮熱者屬脾當出
疹子

用藥驗是否王驗斑

此所謂斑即痘也

法若三日未覺形迹當

以生酒塗身上時時看之狀如蚤痕者是也或曰傷寒傷食潮熱與癰疹不能辨者宜以辛涼之劑調之五日已內發出即汗五日已外無者非癰也各隨應見而治之

驗證施治閻治小兒壯熱昏睡傷風風熱瘡疹傷食皆相似未能辨認間服升麻葛根湯惺惺散小柴胡湯甚驗蓋此數藥通治之不致誤也惟傷食則大便酸臭不消化畏食或吐宜以藥下之海藏云宜以藥下之者

當察其所傷何物生硬寒熱不等不可遽以巴豆之類
大毒之藥下之升麻葛根湯太陰陽明也惺惺散治風
熱咽不利脾不和少陽渴小便不利也小柴胡湯治往
來寒熱胸脇微痛少陽也然欲知其經當以脈別之

小兒耳冷尻冷手足乍暖乍涼面赤時嗽時嚏驚悸此
瘡疹欲發候也未能辨認間服升麻湯消毒散已發未
發皆宜服仍用胡荽酒黃柏膏暑月煩燥食後與白虎
湯玉露散熱盛與紫雪散咽喉或生瘡與甘桔湯甘露

散餘依前說大人小兒同治法惟大小不同耳 海藏
云消毒散太陽藥也白虎湯治身熱目疼鼻乾不得卧
陽明藥也甘露散肺腎藥也甘桔湯少陽藥也紫雪天
冬麥冬黃芩生地為血劑玉露散肺腎藥也石膏寒水
石為氣劑已上五方皆瀉時暑之藥

五臟見證

錢五藏各有一證 肝藏水泡 肺藏膿泡 心藏癰
脾藏疹 歸腎變黑 海肝藏水泡色或青肺藏膿

泡色或白脾藏疹或如麩糠色心藏癰其色赤變歸腎則色黑矣此五色凡痘疹一色者善或二色三色相合而作者凶 第一大小不等 小兒在胎十月食五藏穢血生下則其毒當出故瘡疹之狀皆五藏之液肝主淚肺主涕心主血脾為裏血其瘡出有五名肝為水泡以淚出如水其色青而小肺為膿泡以涕稠濁如膿其色白而大心為癰主血其色赤而小次於水疱脾為疹其色赤黃而小涕淚出多故膿疱水疱皆大血滯於內

所出不多故癰疹皆小又病水泡膿疱者涕淚俱少以液從瘡出故也譬如泡中容水水去則疱瘦矣 婁右水疱者俗謂之水痘也膿疱者俗謂之痘子也癰者俗謂之瘡子也疹者俗謂之麻子也痘之形狀最大水痘次之癰瘡又次之麻子最小隱隱如麻子也 張四藏之瘡名狀不同肝為水疱肝之液為淚淚出如水其色微青而小肺為膿疱肺之液為涕涕如膿色微白而大心主血其瘡為癰色赤而小脾主裏血其瘡為疹色赤

黃而淺此言其初發之狀不同如此及五七日後不問其初出自何藏悉成血疱血疱成膿疱膿疱之後結痂而愈矣或謂肺為膿疱而血疱之後又成膿疱何耶蓋肺為膿疱者言其初出淡淡如膿其色白而非黃若血疱後所結膿疱乃其瘡已熟包裡黃膿其色黃而非白所言膿疱雖同而所以為膿疱則不同也又如脾為疹亦自其初出色黃微赤有小癰瘡而言之耳其成膿結痂收靨而愈與所謂膚疹者名同而實則大不同也

心為癰與所謂溫毒冬溫發癰者亦大不同 萬凡瘡
疹五藏見證要察何藏之證為甚即主其藏之毒多如
肝證毒多者必發水疱生瘰癧成目疾宜預解肝之毒
羌活湯加青皮柴胡 肺證毒多者必增喘嗽煩渴不
止手搥眉目鼻面宜預解肺之毒瀉白散合甘桔湯加
牛蒡子天花粉 心證毒多者必伏不起譫妄飲水煩
哭咬牙宜預解心之毒導赤散加黃連辰砂 脾證毒
多者必成灰白色癢塌吐利宜預保養脾胃以解其毒

四君子湯調元湯加白芍藥防風連翹 腎不見平證
耳聾俱熱者死證也

羌活湯

發熱

瀉白散

肺

甘桔湯

咽喉

導赤散

心

四君子湯

吐瀉

調元湯

即保元湯

部位

萬諸瘡皆屬心火心之華在面瘡痘之候但以面之部位占之思過半矣且痘疹陽毒諸陽皆聚於面吉凶善惡尤易見也額屬心火如印堂以上髮際以下橫兩日

月角位先見紅點先作漿先結靨者此惡候也蓋心為
君主毒發於心故先見於其位君危則十二官皆危其
死速矣左臉屬肝木右臉屬肺金如兩臉先見紅點磊
落者吉如相聚作塊其肉硬腫者死蓋肝藏魂魄肺藏魄
生意既絕魂魄將離故不治也頰屬腎承漿橫抵兩頤
先見紅點先發先靨者吉此位雖屬腎然三陰三陽之
脈皆聚於此陰陽和故可治也鼻屬脾土若準頭先出
先靨者凶蓋脾屬土四藏稟命於脾毒發於脾土敗則

四藏相隨而敗故綿延日久後斃也腎之竅在耳又云
心開竅於耳心腎皆少陰君火也又少陽相火之脈行
耳之前後凡在耳輪先見紅點者凶蓋君相二火用事
燔灼之勢難可撲滅也惟口唇四圍先出先起先靨者
大吉蓋陽明之脈俠口環唇胃與大腸主之無物不受
故也痘家有八門五樞三關兩煞五軸之分 心為赤

帝門

附心胞絡

兩顴為心樞

肝為青陽門

附膽

兩眼眶

為肝樞 脾為黃央門

附胃

兩顴頤為脾樞

肺為肅

殺門 喉突為肺樞 腎為玄武門 兩耳垂為腎樞

胸堂乳阜心之關 臍封脾之關 陽毬腎之關

白帝煞門座於氣窩右太陽 青帝煞門座於眼眶左

太陽 顴阜胸乳之軸 左太陽左脇眼胞兩鬢肝之

軸 右太陽右脇項頸氣突肺之軸 腮頰中庭口角

肚腹手足脾之軸 地閣後頸耳窖背俞腰脊陽毬腎

之軸 袁氏閱痘重門欄輔軸四字門犯則驗欄欄犯

則驗輔輔犯則驗軸至軸而變態盡矣門凡八欄輔各

十有八軸凡一百五十四各分經絡而驗之 天庭穹

隆之地名赤帝門 胸堂名炎車門 兩手掌心名正

離門

不属心而属陽明陽明透徹則鼻先形而掌心次之陽明迅暴則掌心先形而鼻次之標於鼻者順

標於掌者逆

眉心一帶統上下寸地號五將門 眼下絲

竹淚堂名青陽門 氣窩天突穴名肅殺門 兩耳竅

圈為玄武門 臍封之處脾經所注名黃帝門 八門

與前稍異至欄輔軸抑又異矣圖訣繁俚無關治療故

今不取

脈候

瘡疹之疾有形之證無所用診又歲氣主之似不必診
經曰微妙在脈不可不察察之有紀從陰陽始是則不
可不診也先哲有言曰痘疹脈靜身涼者生脈躁身熱
者死可見瘡疹亦用診矣大抵小兒之脈多帶緊數瘡
毒之脈又多浮大而數傷寒論云浮為風虛大為氣強
風氣相搏必成癰疹又曰數脈不時則生惡瘡也七歲
以上五至為平七歲以下六至為平過則為太數邪氣

實也不及為遲正氣虛也浮而數表熱也浮而遲陽氣衰也沉而緊裡熱也沉而細元氣脫也瘡疹為陽病其脈浮沉俱宜帶洪實若弱而無力為陽病見陰脈凶凡診得浮而無根瞥瞥如羹上肥數而急疾連來如雀之啄細而欲散縈縈如蛛之絲遲而欲絕滴滴如屋之漏沉而時見如魚之躍皆死脈也 凡痘子勢重者以脈候之脈洪實者吉浮數虛小者凶 丹溪治一男子年十六歲發熱而昏目無見耳無聞兩手脈皆豁大而

略數知其為勞傷矣時里中多發痘者雖不知人與藥則飲與粥則啜遂教以參耆當歸蒼朮陳皮大料濃與之飲至二十餘貼痘始出又二十貼則成濃疱身無全膚或曰病勞可畏何不用陳氏全方治之予曰此但虛爾無寒也只守前方又數十貼而安後詢其病因為先四五日恐有出痘之患遂極力採樵連日出汗甚多此以脈之豁大而知其虛乃痘疹因脈施治之一例也

氣血

萬人之一身本乎榮衛衛者陽氣所以開闔索篇運動
樞機者也榮者陰血所以充溢臟腑灌溉肢體者也故
氣虛則神機息血虛則化源絕二者不可偏勝也痘疹
之毒本於五臟之液各隨經絡部位直犯榮衛而出氣
血從之觀其表來堅厚窠囊充長者氣之足也根芽紅
活形色潤澤者血之足也氣血既足則痘易發易靨不
須施治以蹈實實之戒如平陷嫩薄者氣之病也乾枯
紫黑者血之病也責而治之不可因循以貽後悔然脾

胃者氣血之父也心腎者氣血之母也肝肺者氣血之
舍也脾納水穀其悍氣注於腎而為氣腎舍於肺而為
衛以溫分肉充皮毛肥腠理司開闔也衛氣虛則瘡不
起發其毒乘氣之虛而入於肺肺受之則為陷伏而歸
於腎矣脾納水穀其精氣注於心而為血心舍於肝而
為榮以走九竅注六經朝百脈也榮血虛則瘡不光澤
其毒乘血之虛而入於肝肝受之則為癢癩而歸於心
矣凡治此者氣病治氣血病治血寒則溫之熱則清之

虛則補之實則瀉之仍以脾胃為主不可犯之也

虛實

萬不知虛實者不可以為工經曰無虛虛無實實虛實之分不可不知也經曰必先度其形之肥瘠以調其氣之虛實此以形體別虛實也又曰穀盛氣盛穀虛氣虛此以飲食別虛實也又曰脈實血實脈虛血虛此以脈別虛實也又曰邪氣盛則實精氣奪則虛此以邪正別虛實也大抵實者邪氣實也虛者正氣虛也經曰邪之

所湊其氣必虛留而不去其病則實是也又云五實死者謂邪氣之實也五虛死者謂正氣之虛也

凡人診同

瘡痘

之證其人形體肥健飲食能多六脈洪實素無疾病大
便如常瘡色紅潤者此表裡正氣俱實也不須服藥若
形體羸怯素多疾病飲食減少六脈微弱吐利頻頻瘡
色淡嫩者此表裡正氣俱虛也陳氏溫補之法可用如
瘡勢太盛焮腫痛脹大熱不退煩渴昏睡大小便秘此
表裡邪氣俱實也錢氏涼瀉之法可用如瘡本稠密焮

發紅活吐利不食者此表實裏虛也於補湯中加解毒藥如瘡色淡白發不透滿大小便秘浩飲大嚼者此裡實表虛也於解利中加發藥又加瘡痛者邪氣實也當活血以開其鬱若痛如刀刺悶亂大叫者勿治瘡癢者正氣虛也當補氣以燥其濕如爬搔不定破爛皮脫者勿治灰白色者氣虛也參耆之功為大乾燥者血虛也歸芎之力宜多虛則補之實則瀉之中病即已無過其制此治之權衡也若本實而反補之則毒氣彌盛或為

潰爛或為癰腫或為目病或為咽瘡或為失血皆補之過也如本虛而反瀉之則正氣益虛或為吐為利為厥逆皆瀉之過也經云毋致邪毋失正絕人長命其此之謂歟

翁夫氣有生血之功血無益氣之理故氣不可虧虧則陽會不及而痘之圓暈之形不成血不可盈盈則陰乘陽位而痘之倒陷之禍立至是痘有氣血虛實之殊也大抵寒為虛熱為實氣虛則宜溫補氣實熱則宜清涼

血虛則宜補血血熱則宜解毒必取其氣血中和無過不及可也何謂氣血虛實且如氣過則瘡血過則癰氣不及頂陷不起血不及漿毒不附凡痘色淡白頂不堅實不碍指不起脹皆屬氣虛大宜保元倍加酒炒黃芪肉桂川芎丁香人乳好酒同服根窠不紅或紅而散亂以手摸過即轉白痘上如寒毛豎起枯澀不活者皆血虛也宜保元加川芎當歸酒洗紅花及下山查以消參芪之滯再下木香數分以行滯氣而血自活也凡用黃

者當在痘盡出之後凡用熱藥當看毒盡解之時又察
氣血虛實而治之則藥無不効矣凡補血首尾用地黃
防滯血必用薑製用芍藥恐酸寒伐胃氣必用酒炒

虛證調護論痘證以元氣為主元氣充實則毒易出易
化故善治痘者惟保元氣於虛弱述前使不致於耗散
為貴耳然其治法惟何一曰實腠理而固肌表二曰節
飲食而保脾土肌表固則外陷之患不足慮脾土實則
下陷之患不足憂更加以參耆補益之功則元氣自然

充實而痘之出也自然易以成漿變症不生而結靨順
候矣是以禁用寒涼蕩滌之劑如大黃滑石車前生地
鼠粘紫草枳殼之類恐其蕩滌潤下遂傷脾胃脾胃傷
則元氣由此而下陷氣脫內攻而死勢所必至是則藥
殺之也禁用滑潤發散之劑如鼠粘人牙蟬退麻黃乾
葛升麻紫草桔梗羌活防風荆芥之類恐其發散太過
遂致表虛表一虛則元氣由此而外耗塌癢外剝命由
此喪誰之過歟

虛證補氣不補血虛弱痘證精神倦怠面青眊白蓋氣不充則精神倦怠血不榮則面青眊白今治虛證補氣不補血者何也氣有神而無形補之則易充血有形而無神補血之藥難收速効况氣陽而血陰陰從陽血從氣者理也故補氣不補血使氣盛而充則血自隨而亦盛矣况補血之劑如當歸生地皆能潤燥滑下多用恐致溏泄故耳然虛證痘疹亦有白陷不榮不得已而用當歸芍藥補血之劑亦有虛火外浮痘點繁紅而類於

血染之證不得已而用紫草紅花生地活血涼血之藥
並用酒炒以折其潤下之性借酒力而行之達表則補
血活血之中而有升發達表之妙庶無潤腸溏泄之患
矣 虛證壞勢必至辨氣虛痘證初發身熱悠悠乍熱
乍涼肌慢神倦面青眊白飲食減少手足時冷時熱嘔
吐便溏痘點方見隱隱不振淡紅皮薄三四日陸續不
齊不易長大五六日不易成漿少食氣餒傷食易泄七
八日塌陷灰白不起自汗微渴或腹脹喘渴泄瀉塌癢

悶亂咬牙寒戰頭溫足冷勢所必至故治虛痘初發之際不宜投參蘇飲人參敗毒散黃連解毒湯升麻葛根湯紫草三豆飲當用參芪飲氣粗皮燥無潤色亦忌之只以四君子減人參少加桔梗川芎腹皮補益之中略佐以升提之法為妙點子出齊重用參耆及至八九日間無他凶證用法如常若或頂陷灰白不起漿清自汗微渴大補湯加桂塌陷灰白腹脹泄瀉木香散塌廢悶亂腹脹渴瀉喘嗽頭溫足冷寒戰咬牙者急進異攻散

救之

虛證變實氣虛痘證父母能守禁忌及用藥不誤調變
順候則元氣充實腠理堅固脾胃強健飲食如常二便
清調矣若補益太過漿足之後重用參耆容亦有腹脹
喘急之患用枳殼湯悞用五苓木通多則有大便秘塞
之患用寬中散便實而渴麥門冬湯過用丁桂辛熱之
劑則亦有咽喉腫痛煩燥閉渴之變滋陰潤燥湯蓋喘
急腹脹大便秘堅煩渴咽痛皆類實證也然而氣虛變

實者非真實也是病淺而用藥過深之失也只宜斟酌
不宜疎通重治疎利之過則方生之氣復虛而脫證將
至矣

虛證似實氣虛痘證或為飲食生冷調理失宜致傷脾
胃遂成泄瀉津液下陷虛火上盛必發而為渴元氣下
陷則虛陽上擁下氣不續必發而為喘夫渴與喘實證
也起於泄瀉之後則為津液暴亡而渴氣虛而喘豈有
實熱而渴氣擁而喘生於泄瀉之後哉故治渴則用參

苓白朮木香散渴瀉不止異攻散喘則用人參定喘湯
獨參杏仁湯喘渴而瀉木香異攻散悶亂腹脹毒成內
攻眼合自語已名失志謬認為實醫何愚哉

實證似虛身發壯熱毛直皮燥睡卧不寧腮紅睛赤氣
粗煩渴腹脹便秘喘急皆實症也此熱盛毒重壅遏之
故而又見嘔吐之證嘔吐似虛也然未知熱毒在內不
得伸越則上逆攻衝而吐經云諸逆攻衝皆屬於火者
是也或為寒冷所搏或因乳食不節致傷風冷則使內

熱不得發越冷煖相拒而吐毒不得伸越者從升陽發散為最相拒而吐者引之使下如豬苓澤瀉橘皮之類又有泄瀉之證兼見者泄瀉似虛也然因熱毒鬱盛燻炙脾胃不得外達則毒從下陷尋竅而泄所謂熱毒下注者是也古云未出而瀉者生既出而瀉者死概可見矣治法以升提發散引毒達表毒得外解則內泄自止兼傷食而瀉者輕則加消化之劑重則從之又有不思飲食書云不思飲食皆屬內虛者是矣然不知鬱熱之

證蓋因毒氣在內不得伸越達於肌表二便秘結腠理
阻塞熱毒壅盛腹脹滿急不思飲食者必然之勢也治
法以升提發散引毒達表則熱氣有所伸越而臟腑和
平飲食自進矣若候用丁桂半夏等熱藥於嘔吐泄瀉
不食之證是以熱攻熱而轉增煩劇用人參黃耆茯苓
白朮等補劑於腹脹不思飲食之證則邪得補而愈盛
藥一入口立見殺人醫之過也可不慎歟他如龍骨豈
菴雖能止泄神麴麥芽硝砂雖能助脾化食皆不當用

於壅熱不食之證繼余業者鑒之

熱證變虛血熱痘證只宜清涼發散不宜峻用苦藥若
過投寒劑如升麻苓連及滑泄之藥必致內傷脾胃外
冰肌肉脾胃傷輕則飲食減而溏泄重則洞泄無度而
遂致虛寒肌肉冰則熱蒸之氣不行腠理閉澀痘不肥
大不起發不行漿而遂成伏陷此熱證變虛之驗虛證
既明便從虛治參芪丁桂亦所不忌五六日後見之則
木香異攻在所宜施惟在審證而斟酌之也

壅熱變虛毒盛壅遏固宜升提發散為主而佐以清涼
解毒為善又宜得平乃止若發散太過必致肌表空虛
元氣耗散內貫清漿或虛擡空殼或癢塌外剝或潰爛
不收百變皆至見此數端皆成表虛表既虛則元氣從
此耗泄而內氣亦不能以自守略傷飲食或生冷則成
泄瀉泄瀉不止遂成虛寒而氣脫煩渴悶亂寒戰咬牙
無所不至矣既知虛證治從虛例參芪白朮丁桂薑附
亦所不忌六七日後見之雖木香異攻亦宜急進在察

證而酌量之也

壅熱用異攻辨實熱壅遏之證多用寒涼致冰伏泄瀉
發散太過或成表虛既成冰硬藥宜溫和薑桂之熱亦
所不忌泄瀉之後熱氣自散真氣自虛既成氣虛藥宜
補益氣虛必寒虛寒既明藥宜溫補是以始出之時雖
為血熱壅遏至於三四日後身反不熱肌膚冰冷痘瘡
不長焉得不進以溫和之劑如官桂乾薑川芎之類使
內氣一暖則外氣自和泄瀉之後其內必虛雖有腹脹

煩渴喘急馬得復為實熱不過內虛伏陷毒成內攻而然故實熱之證七八九日曾經泄瀉皆從虛治有木香異攻之證便進木香異攻為貴如無冰硬之證切勿悞投溫劑無泄瀉之證勿得悞投木香異攻等蓋塌陷倒靨乾枯而無冰硬泄瀉之患者多因熱毒內攻而然故宜百祥豬尾等方以治之可也

陰陽

痘出有三陽三陰之異常須辨之勿令悞也 太陽病

寒身熱小便赤澀出不快宜荊芥甘草防風湯 少陽

病乍冷乍熱出不快宜連翹防風湯 陽明病身熱目

赤大便閉實瘡徧肌肉出不快宜升麻葛根湯 初熱加

紫草 太陰病自利四肢逆冷宜附子理中湯 瀉 木香

散 瀉 少陰病黑陷口舌乾躁宜四物湯加紫草紅花

厥陰病卵縮舌卷時發厥逆宜大異功散 出不加防

風青皮 三陰病法當救裡故宜以溫劑助之

辨三陽證治 凡痘疹當春秋為順正純陽之時也古人治法與傷寒之證同

足脛熱 兩腮紅 大便秘 小便澀 渴不止

上氣急 脉洪數 已上七證不宜服熱藥

瘡疹一發有密如蚕種者或如糠粃者合清表宜連

翹升麻湯

見形

或未出而先發搐是兼外感風寒之

邪宜茶湯解毒丸

痘驚

及犀角地黄湯

失血

瘡出不

快清便自調知其表當微發散升麻葛根湯

初熱

若瘡青乾黑陷身不大熱大小便澀滯是熱蓄於

內宜煎大黃湯下宣風散

發熱

若表大熱者不可下

黑陷甚者百祥丸

黑陷

若瘡已發稠密微喘渴欲飲水

宜微下之當歸丸及龐氏地黃膏

見形

外以黃櫨膏

見形

塗面

值盛夏暑熱正熾適瘡大發煩渴大便實者

宜玉露散

吐瀉

及甘露飲子

咽痛

或昏冒不知人時作

搐搦瘡倒靨黑陷者宜豬心龍腦膏

黑陷

辨三陰證治

凡瘡發於秋冬為逆當純陰之時也

足脛冷

腹虛脹

糞青色

面眇白

嘔乳食

目睛青

脈沉微

已上七證不宜服寒藥

痘瘡盛出四肢逆冷或自利係在太陰脾經宜急溫

之用異攻散

快出不

附子理中湯

瀉

調中丸

瀉

痘瘡

平塌灰白色不澤此是正氣不足宜十補托裡散倍

黃耆加熟附子

或四肢厥冷時作搐搦係在厥陰

宜溫之異功散

快出不

加防風青皮或白朮散

渴

去乾

葛藿香加附子肉桂

痘瘡證有陽盛陰虛有陰盛陽虛陽盛者飲冰雪不知

寒陰盛者飲沸湯不知熱凡發熱作渴手足逆冷大便

自利喜飲熱湯皆陰盛陽虛也薛氏用大異功散

出不快

八味丸治之若發熱作渴而大便秘結手足竝熱喜飲

冷水皆陽盛陰虛也薛氏用四順飲

熱地黃丸

腎

治之

若煩熱作渴面赤睛白此為腎經虛熱亦宜地黃丸之

類陳文中治陰盛陽虛用大異功散加木香當歸以補

陽是矣治陽盛陰虛用木香散加丁香官桂以補陰不

為以火濟火乎此陳氏方所以為一偏之術而見識於

前哲也學者不察而誤用之天枉可勝道哉

形氣

凡瘡疹已出後有聲音者乃形病而氣不病也身溫者

宜解毒防風湯

法大

大便閉者宜當歸丸

秘便

瘡疹未出

先聲音不出者乃形不病而氣病也宜補肺散

失音

加生

黃耆 若瘡疹出而聲音不出者是形氣俱病也小兒

稟賦素弱者宜預服十奇散

即十宣散見起發

倍歸芎少木香

煎服

或云宜十補散或大異功散或云形氣俱病者當清其肺宜八風湯并涼膈散去硝黃主之

辨形氣不足法

肺主氣氣不足則致後三證

自汗聲不出 瘡頂陷塌 不綻肥 竝宜十奇散

自汗倍黃芪聲不出倍桔梗

心主血血不足則致後三證

灰白色 根窠不紅 不光澤 竝宜芎歸湯加芍

藥紫草紅花良驗

輕重

錢凡瘡疹若出辨視輕重若一發便出盡者必重也痘

夾疹者半輕半重也出稀者輕裡外肥紅者輕外黑裡
白者微重也外白裡黑者大重也瘡端裡黑如鍼孔者
劇熱也青乾黑陷睡汗出不止煩躁熱渴腹脹啼喘
大小便不通者困也凡瘡疹當乳母慎口不可令饑及
受風寒必歸腎變黑難治海或極熱反煎水化者亦
能變黑當以涼藥主之不可不察以脈別之可也或有
出色正者內素有熱頭反陷色或灰青似黑中有鍼眼
下陷當急以清涼藥疏之便結者大黃牽牛之類便軟

者金花丸之類主之

陳輕者作三次出 大小不一等 頭面稀少 眼中

無 根窠紅 肥滿光澤 重者一齊並出 密如蠶

種 身熱腹脹 瘡灰白色 稠密無縫 瀉渴不止

頭溫足冷

輕變重 犯房室 不忌口 先曾瀉 飲冷水 餌

涼藥

重變輕 避風寒 常和煖 大便稠 不躁渴 忌

生冷 忌外人

右飲冷水餌涼藥若內有實熱者不須忌之

二日三日痘瘡始見微微纔出如粟米大或如黍米大
或如菜豆大似水珠光澤明淨者佳不須服藥 四日
五日痘瘡大小不等根窠紅活光澤明淨者輕如稠密
陷頂灰白色瀉渴者重 六日七日痘瘡肥紅光澤者
輕如身溫氣促口乾腹脹足指冷者重 八日九日痘
瘡長足肥滿蒼蠟色者輕如寒戰悶亂腹脹煩渴氣急

咬牙者至重也 十日十一日痘瘡當靨瘡痂欲落而愈如身熱悶亂腹脹泄瀉寒戰咬牙者重

翁輕痘歌 熱煖神清痘小稀根窠紅活出參差四肢溫煖無寒熱乳食如常渴瀉除太陽面頰俱光潤手足累累圓似珠更兼腰項當心少但宜調護不須醫

重痘歌 初熱一日即便出稠密鮮紅減飲食泄瀉煩渴頭面多紅斑夾疹二便澀平濶灰白欠光明疔毒膿瘡水流濕若此重證須預防莫待臨期有疎失

萬古人云輕變重重變輕輕者指出稀者裏外肥紅者人見其輕遽生急急之心不避風寒不節飲食不慎禁戒不擇醫巫以致感風寒則生外熱傷飲食則生內熱熱氣薰蒸或翻出瘡痘稠密者或痘後目盲發癰者或腹脹或煩躁或吐利犯禁戒則為瘙癢為潰爛醫之誤則補所不當補瀉所不當瀉巫之誣則呪水灑之以傷其表令之飲水以傷其裡往往變為重疾歸之氣數抑何愚哉重者指出密者外黑裡赤者外白裡黑者能存

憂懼之心適寒溫慎飲食禁戒必守醫巫必擇自然易
發易靨能變為輕非人能勝天乎

辨不藥而愈

痘脚稀疏 根窠紅綻 不瀉不渴 乳食不減

四肢溫和 身無大熱 以上六證竝不須服藥惟

宜善加調護須使房室溫蓋屏諸穢氣忌見外人母
犯房色及往來婦人月水併腋臭者皆不可近惟宜
燒大黃蒼朮以辟惡氣勿宜燒沉檀降真乳香腦麝

幃帳之內宜懸胡荽或以胡荽漬酒噴床帳並燒木
香為佳夫痘瘡之毒最怕穢惡之氣觸犯切不可
信僧道看經解穢况無纖毫之力而反恐被其穢惡
之氣觸犯亦不可恃其能解而不預防戒之戒之
辨五不治證

癢塌寒戰咬牙渴不止 痘紫黑色喘渴不寧 灰
白色陷頂腹脹 頭溫足冷悶亂飲水 氣促泄瀉
渴

順逆

錢大抵瘡疹屬陽出則為順故春夏病為順秋冬病為逆冬月腎旺又盛寒病多歸腎變黑又當辨春膿疱夏黑陷秋癍子冬疹子亦不順也 凡瘡疹只出一般者善 先發膿疱後發疹子者順 先發水疱後發疹子者逆 先發膿疱後水疱多者順少者逆 先發水疱後發癍子多者逆少者順 先發疹子後發癍子者順 先發膿疱後發癍子者逆

海藏云此一句足以知雜出者諸藏相合而不齊也

用藥亦難矣前斷云五色各隨五藏亦有二色相合或有三色即無定也此與前後膿水斑疹大小不同先後逆順大瘡疹既出而有順逆者三有時之順逆有虛實意相若

之順逆有出入之順逆蓋春夏陽氣發生瘡疹為順秋冬陽氣伏藏瘡疹為逆此時之順逆也大小便閉而能食者為實為順大小便利而不能食者為虛為逆此虛實之順逆也瘡疹出者為順倒靨陷伏者為逆此出入之順逆也萬春夏為順秋冬為逆此亦語其生長收藏之理爾豈有春夏皆順而吉秋冬皆逆而凶者乎如

春失奉生夏失奉長則春夏亦逆秋能養收冬能養藏
則秋冬亦順也惟痘出一般疎密得所不愆其期證之
順也痘出夾雜帶癍帶疹稠密無縫常失其期證之逆
也噫春夏為順秋冬為逆古人之言豈真拘拘於時令
之說耶蓋春夏發生之令也秋冬殺伐之令也痘瘡之
出起發者得春夏之令所以為順陷伏者得秋冬之令
所以為逆其斯之謂歟或云春膿疱金尅木夏黑陷水尅火
秋癍火尅金冬疹土尅水為之逆者此不經之談黑陷一證

四時不治何但在夏耶故非其時而有是證者血氣和平臟腑充實莫不皆順如其時而有是證者氣衰血弱臟腑虛憊莫不皆逆 古人著書有泛語其概者有直道其實者以意逆志不以詞害意可也錢氏小方脈之祖醫中之聖無出其右者宜若所著之論更無可議矣然亦有未可盡信者或泛語其概或後人補之者也如云先發膿疱後發疹子者順脾肺相生也先疹子後癰子者順心脾相生也先發水疱後發疹子者逆肝剋脾

也先發膿疱後發癰子者逆心尅肺也先發膿疱後發
水疱多者順少者逆肝多肺少木乘金衰也先水疱後
癰子多者逆少者順子衰母旺則順火乘木衰則逆也
此皆泛語其概耳其曰凡瘡疹只出一般者善此則直
道其實者也夫四毒之發各有其時膿疱最酷疹次之
水疱又次之癰為輕分作四番其毒則微一併夾出其
毒則甚矣如云春夏為順秋冬為逆春膿疱金尅木也
夏黑陷水尅火也秋癰子火尅金也冬疹子土尅水也

此亦泛語其概耳其曰黑者無問何時十難救其一二此則直道其實者也蓋四者之毒常乘天地不正之令而發乃疫癘之氣傳染相似時亦不得主之也又云冬月腎旺又盛寒病多歸腎變黑此則後人因秋冬為逆而杜撰以補之者也錢氏謂春夏為順秋冬為逆者蓋以瘡疹屬陽春夏為陽秋冬為陰從其氣則順違其氣則逆不過欲人常和煖而從春夏之化未嘗拘定某證必某時為順也即如冬月變黑之說則凡冬月出瘡疹

者不分輕重皆變黑而死天地之氣必不如是之隘錢氏之意亦不如是之拘也但曰冬盛寒腠理閉塞氣血凝滯非和煖瘡難成就可也何必以變黑歸腎獨主於冬乎彼夏盛熱腠理開張氣血淖澤亦有變黑歸腎而死何不云夏有黑陷乎設云夏火旺腎不主事則夏黑陷為逆之言又何自而取乎況黑陷為逆四時皆然亦不獨在於夏也

動靜

凡物得其平則靜失其平則動經曰陽氣者靜則養神
柔則養筋又曰陰氣者靜則神藏躁則消亡夫患痘者
陰陽俱病息欲其勻語欲其少寐欲其定寤欲其寧饑
則索食渴則少飲觸其瘡則吟拂其欲則鳴此平人之
候神清氣定謂之靜而吉也如呻者身有苦也自語者
神不清也喘粗者內熱也腸鳴者洩也坐卧不定者心
煩也啼叫不止者痛也搖頭者風也指欲搔者癢也嚥
物難者咽痛也咬牙者心肝熱也若悶亂躁擾譫妄昏

眩如見鬼狀搖頭扭項手舞足擲目睛上翻寒戰咬牙
語音不出則皆死候矣如病向靜忽作擾動者異也以
法求之如瘡色變無他候者此戾氣所觸也如瘡色不
變又無他證此必有因但俟自定其有目瞑息微四肢
僵直口噤瘡壞昏睡不醒者此真氣將脫魂魄將離之
兆又不可作靜診也

形色

或云痘瘡之候無以脈診言形色可辨也謂之形者痘

之形也故尖圓堅厚始出之形發榮滋長欲壯之形飽
滿充足成漿之形歛束完固收靨之形與大豆豌豆菜
豆相似者皆正形也或平或陷形之變也如初出時空
若蠶種之蛻隱如蚊蚤之迹薄如麤片密如鍼頭若熱
之沸寒之粟者不能起發而死粘聚模糊肌肉虛浮溶
軟嫩薄皮膚潰爛者不能收靨而死謂之色者痘之色
也喜鮮明而惡昏暗喜潤澤而惡乾枯喜蒼蠟而惡嬌
嫩紅不欲燄燄則易破白不欲灰灰則難靨由紅而白

白而黃黃而黑者此出形起發成漿結痂之正色也出形而帶紫起發而灰白此色之變能辨痘之形色可知生死之期先賢看痘有四曰根曰窠曰脚曰地用是以驗吉凶斷生死不易之法也何謂窠中透而起頂者是也何謂根外圈而紅者是也即圈之紅否而其中之虛實與痘毒之淺深可見矣即窠之起否而根之淺深氣血之盈虧可定矣所謂脚地則本乎根窠之圓混痘子之稀密也紅暈之處謂之脚彼此顆粒界限分明不散

不雜者此痘脚明淨也空隙之處便謂之地彼此顆粒不相連綴者此地面明淨也根欲其活窠欲其起脚欲其固地欲其寬四者俱順痘雖密無慮矣 圓者氣之形也氣盛則痘窠必圓滿周淨暈者血之形也血盛則痘窠必光明紅活氣虛則頂陷氣散則塌阻或有氣虛極而不塌陷者乃火載之雖見圓滿實空殼如泡然也血虛則暈淡血憊則暈枯根必散或有血虛極面猶紅色者乃火上浮雖見圓暈實枯槁而不潤澤也 痘色

之明暗係於血氣之虛實如色之紅者痘初出也白者
毒未解也黃者毒將解也乾黃者毒盡解也灰白者氣
衰而血不附也紫者毒盛而血滯也黑者熱極而兼水
化也焦渴者氣血枯也紅變白白變黃者順而生紅變
紫紫變黑者逆而死

初驗之時以紅紙蘸清油燃火照之驗其生意有無又
以手揩摩面頰如紅色隨手轉白隨白轉紅謂之血活
生意在矣如揩之不白舉之不紅是為血枯縱疎不治

又看目睛神光瞭然口唇尖上紅活如常無燥白之色
乃是吉證萬無憂也

疎密

痘欲其疎疎則毒少不欲其密密則毒甚此古今確論
也疎密之分各有喜忌如頭面欲疎元首不可犯也頸
項欲疎管籥不可塞也胸背欲疎臟腑俞募之所附也
若夫手足不忌其密矣謂之疎者非但稀少也鋪排磊
落大小勻淨亦可以言疎謂之密者非必盛多也攢聚粘

連片復一片雖只數處亦可以言密疎而凶者亦有數等如初出時纔見紅點三兩處其熱便退可以語其疎也苟大熱不解唇口燥裂大小便秘煩燥不寧或身無熱但增煩渴者此由毒甚鬱遏於中不能遽出日復漸出漸加稠密一也又如初出一兩點頂尖焦黑或三四粒作一堆者僅見數處他無所出喜睡不食煩渴大小便澀此由毒伏於中加譖妄者不待起發而死若能起發後必發癰毒也二也亦有出現實疎遂生玩忽之心

禁忌不守風寒不避飲食所傷湯丸之試變生不測三也設有密而吉者治之早衛之嚴裡無病而瘡悉成也

老嫩

嘗觀朝華之草夕而零落松柏之堅凌冬不衰夫以草木堅脆不同堅者難壞脆者易傷況於人質有厚薄氣有強弱耶彼痘瘡之毒喜老而惡嫩蒼蠟嬌紅色之老嫩也緊實虛浮形之老嫩也濃濁清淡漿之老嫩也堅厚軟薄痂之老嫩也老嫩之故衛氣主之經曰衛氣者

所以溫分肉充皮膚肥腠理司開闔者也是故衛氣強則分肉堅皮膚厚腠理密而開闔得也所以收斂禁束制其毒而使不得以放肆故色蒼而蠟形緊而實漿濃而濁痂厚而堅自然易壯易靨雖有邪風穢毒不能害也如衛氣弱則分肉脆皮膚薄腠理疎而開闔失也所以不勝其毒而毒得以恣其猖狂之性故色嬌而紅形虛而浮漿清而淡痂軟而薄易破難靨不待邪風穢氣而先敗壞矣觀夫瘡之老嫩則氣不可不養也

乾濕

丹溪云瘡乾者宜退火濕者宜瀉濕 退火止用輕劑
荊芥升麻葛根連翹之類 瀉濕乃肌表間濕宜用風
藥防風白芷之類 痘初起時自汗不妨蓋濕熱熏蒸
而起故也

證治準繩卷八十一